

Petersen Dyggve

I.

N'est pas a soi qui eimme coraument,
ne cil amis qu'Amours ne puet destraindre,
et sachiez bien, qui de li se desfent,
qu'il ne porroit a haute honnour ataindre.
Li viguerouz ne s'i pueent desfendre,
maiz qui miuz vaut plus tost s'i leisse prendre,
quar d'Amours sunt tuit li bien a devise,
ne ja sanz lui n'iert grant joie conquise.

II.

Faus et felons voi costumierement,
qui se painnent d'abaissier et d'estaindre
joie et honour sanz lor amendement;
maiz granz amours ne puet pour eus remaindre.
Mal m'ont il fait, maiz ja pour ce n'iert mendre
ma volenté de servir ne d'atendre.
Si servirai, maiz ne sai en quel guise
viegne si haut de si bas par servise.

III.

Diex qui en moi fist pluz qu'en autres cent
Amours venir et nestre et croistre et maindre,
m'en doint joïr issi veraïement
con je n'ai cuer ne nul talent de faindre
vers ma dame, qui ne l'os faire entendre;
mieuz vueill mon cors de bele mort souprendre
qu'ele soit ja nul jour par moi requise,
maiz el set bien qu'est pitiez et franchise.

IV.

Se touz li mons savoit ce que je sent,
nis li felon devroient ma mort plaindre,
qu'en morant vif, si con Amours consent;
maiz ne me puet trop grever ne destraindre.
Tel gré m'en sai c'onques osai emprendre
si haute amour qu'en moi ne doit descendre
li guerredons, ne ja n'en iert seurquise
cele u valors et biautez est assise.

V.

Je n'ai mestier de desconfortement,

n'a male gent ne se fait nul complaindre;
maiz qui aime, set et voit et entent
que granz amours n'est pas legiere a faindre,
quant il li plait en fin cuer a descendre,
que n'a pooir qu'a li puisse contendre;
et ele est si dedenz mon cuer reprise,
la merci Dieu, qu'a mon gré me justise.

VI.

Toute autre riens ocist home et debrise
fors soul amors, quant ele est a droit prise.

VII.

Chantez, Renaut, qui amez sanz faintise,
quar leissié l'ont li dui de Saint Denise.

- letto 343 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/petersen-dyggve-51>